

Erschti Hiuf

We dr Honig nümm chasch stryche, wöu är het kristallisiert
steusch ne ufen Ofen ufe, bis är wieder flüssig wird
Ds Lyntuech wösch isch mit Bachpulver, umso wysser strahlts
und gäge Rotwyfläcke ufem Lieblings-Hemli nimsch de Salz
wosch ds Siuberbsteck zum Glänze bringe, gryfsch zur Zahnpaschta
und Lavändu bruchsch, wed mau sötsch Motte im Chleiderschrank in ha

**Für fasch Aues git's e Lösig und i weiss du kensch se Au,
bisch mit aune Wasser gwäsche, so ideerych und schlau.
Für fasch Aues git's e Lösig und stahn i mau im Schiuf,
weiss i, won i mi muess mäude – Du bisch myni Erschti Hiuf!**

Natron eliminiert nid nume Rost ir Röstipfanne
dr Zibelegriech a de Finger isch o subito vergange
Rollmops, Späck und Spiegelei – i kämpfe gäg ne Kater
zu glyche Teile Wasser suufe, meint hie mi Berater
mit Sellerie und Artischocke steisch o du di Maa
und gäge miudi Depressionen hiuft Johannis-Chrut derna

**Für fasch Aues git's e Lösig und i weiss du kensch se Au,
bisch mit aune Wasser gwäsche, so ideerych und schlau.
Für fasch Aues git's e Lösig und stahn i mau im Schiuf,
weiss i, won i mi muess mäude – Du bisch myni Erschti Hiuf!**

Du bisch myni unbestrittni Erschti Hiuf!